



# SLUŽBENE ZENIČKO- NOVINE DOBOJSKOG KANTONA

Godina X - Broj 11

ZENICA, Utorak, 18. 10. 2005. g.

## SKUPŠTINA

305

Na osnovu člana 37. tačka f. Ustava Zeničko-dobojskog kantona, Skupština Zeničko-dobojskog kantona na 35. sjednici održanoj 12.10.2005. godine, d o n o s i

## ZAKON

### o izmjenama i dopunama Zakona o radu u Zeničko-dobojskom kantonu

## Član 1.

U Zakonu o radu u Zeničko-dobojskom kantonu («Službene novine Zeničko-dobojskog kantona», broj:11/02) u članu 1. stav 1. iza broja: «32/00», dodaje se: zarez i broj «29/03».

U prvoj alineji iza riječi: «pripravnikom» dodaju se riječi: «i ugovora o obavljanju pripravničkog staža».

## Član 2.

Član 2. mijenja se i glasi:

«Ugovor o radu može se zaključiti sa pripravnikom, ako poslodavac za to ima poslovni interes».

## Član 3.

Iza člana 2. dodaju se novi članovi 2a. i 2b. koji glase:

## «Član 2a.

Poslodavac može zaključiti ugovor sa pripravnikom na onoliko vremena koliko traje pripravnički staž propisan za zanimanje na koje se odnosi.

Ugovor se zaključuje u pisanoj formi.

Kopiju ugovora poslodavac dostavlja nadležnoj službi za zapošljavanje u roku od pet dana od dana njegovog zaključivanja radi evidencije i kontrole.

Pripravnikom se smatra lice sa završenom srednjom ili višom školom, odnosno, fakultetom koje prvi put zaključuje ugovor o obavljanju pripravničkog staža ili zasniva radni odnos u tom zanimanju, a koje je, prema Zakonu, obavezno položiti stručni ispit ili mu je za rad u zanimanju potrebno prethodno radno iskustvo.

U toku obavljanja pripravničkog staža pripravnik ima pravo na novčanu naknadu u iznosu najmanje 80% od najniže plaće. Poslodavac i pripravnik mogu se dogovoriti i o većem iznosu novčane naknade, ovisno od stručne spreme pripravnika.

Poslodavac osigurava pripravnika za slučaj povrede na radu i profesionalne bolesti, a zdravstveno osiguranje osigurava nadležna služba za zapošljavanje.

Pripravnik ima pravo na odmor u toku radnog dana, dnevni odmor između dva uzastopna radna dana i sedmični odmor.

## Član 2b.

Ako je stručni ispit ili radno iskustvo utvrđeno Zakonom ili Pravilnikom o radu, uslov za obavljanje poslova određenog zanimanja, poslodavac može lice koje završi školovanje za takvo zanimanje primiti na stručno osposobljavanje za samostalan rad, bez zasnivanja radnog odnosa (volonterski rad).

Ugovor sa volonterom zaključuje se u pisanoj formi. Kopiju ugovora poslodavac dostavlja nadležnoj službi za zapošljavanje u roku od pet dana od dana zaključenja ugovora radi evidencije i kontrole.

Volonterski rad može trajati onoliko vremena koliko je propisano trajanje osposobljavanja prema Zakonu, za određeno zanimanje.

Trajanje volonterskog rada iz stava 3. ovog člana računa se u pripravnički staž i radno iskustvo kao uslov za rad na određenim radnim mjestima, ili za polaganje stručnog ispita.

Volonter ima pravo na zdravstveno osiguranje kako je to utvrđeno propisima za nezaposlena lica.

Radi osiguranja za slučaj povrede na radu ili profesionalne bolesti, poslodavac plaća nadležnoj službi za zapošljavanje 35% od najniže plate za svakog volontera.

Volonter ima pravo na odmor u toku radnog dana, dnevni odmor između dva uzastopna radna dana i sedmični odmor».

## Član 4.

Ovaj Zakon stupa na snagu osmog dana od dana objavljivanja u «Službenim novinama Zeničko-dobojskog kantona».

Broj:01-02-28379/05

PREDSJEDAVALAČI

Zenica, 13.10.2005. godine

Besim Spahić, s.r.

306

Na osnovu odredbe poglavlja V, odjeljak A, člana 37. stav 1. tačka f. Ustava Zeničko-dobojskog kantona, Skupština Zeničko-dobojskog kantona na 35. sjednici, održanoj 12.10.2005. godine, d o n o s i

**ZAKON****o izmjeni Zakona o unutrašnjim poslovima  
Zeničko-dobojskog kantona****Član 1.**

U Zakonu o unutrašnjim poslovima Zeničko-dobojskog kantona-Prečišćeni tekst («Službene novine Zeničko-dobojskog kantona» broj 15/04), u članu 28. stav 5. iza riječi «najmanje» riječ «tri» zamjenjuje se riječju «dvije».

**Član 2.**

Ovaj zakon stupa na snagu danom objavljivanja u «Službenim novinama Zeničko-dobojskog kantona».

Broj: 01-02-28380/05

**PREDSJEDAVALA**

Zenica, 13.10.2005. godine

Besim Spahić, s.r.

307

Na osnovu člana 1.10 Izbornog zakona BiH («Službeni glasnik BiH», broj: 23/01, 7/02, 9/02, 20/02, 25/02, 4/04, 20/04, 25/05 i 52/05), Skupština Zeničko-dobojskog kantona na 35. sjednici, održanoj 12.10.2005. godine donijela je

**ODLUKU****o prestanku mandata poslanika u Skupštini  
Zeničko-dobojskog kantona****Član 1.**

Abdulahu Delibašiću prestaje mandat poslanika u Skupštini Zeničko-dobojskog kantona, sa 12.10.2005. godine, zbog podnošenja ostavke.

**Član 2.**

Odluka stupa na snagu danom donošenja i objavit će se u «Službenim novinama Zeničko-dobojskog kantona».

Broj: 01-01-28381/05

**PREDSJEDAVALA**

Zenica, 13.10.2005. godine

Besim Spahić, s.r.

308

Na osnovu člana 37. stav 1. tačka f. Ustava Zeničko-dobojskog kantona, člana 2. stav 1. i člana 3. Zakona o ustanovama («Službeni list RBiH», broj 6/92, 8/93 i 13/94), člana 35. stav 4. i člana 36. stav 2. Zakona o zdravstvenoj zaštiti («Službene novine FBiH», broj 29/97), Skupština Zeničko-dobojskog kantona, na 35. sjednici održanoj 12.10.2005. godine, donijela je

**ODLUKU****o osnivanju Javne zdravstvene ustanove  
Kantonalni zavod za borbu protiv bolesti  
ovisnosti****I OPĆE ODREDBE****Član 1.**

Ovom odlukom Zeničko-dobojski kanton (u daljem tekstu: Kanton), osniva Javnu zdravstvenu ustanovu

Kantonalni zavod za borbu protiv bolesti ovisnosti (u daljem tekstu: Zavod), koja sadrži:

- naziv i sjedište Zavoda,
- djelatnost,
- iznos sredstava za osnivanje i početak rada, način obezbjeđivanja sredstava za rad i način raspolaganja viškom prihoda nad rashodima,
- međusobna prava i obaveze između Kantona i Zavoda,
- prava, obaveze i odgovornosti u pravnom prometu,
- upravljanje i rukovođenje,
- rok za donošenje statuta Zavoda, imenovanje upravnog odbora i direktora Zavoda i druga pitanja od značaja za rad Zavoda.

**II NAZIV I SJEDIŠTE****Član 2.**

Zavod u pravnom prometu posluje pod nazivom: «Javna zdravstvena ustanova Kantonalni zavod za borbu protiv bolesti ovisnosti».

Sjedište Zavoda je u Zenici, Ulica Fra Ivana Jukića 2.

**Član 3.**

Zavod stiče svojstvo pravnog lica nakon upisa u sudski registar.

**III DJELATNOST****Član 4.**

Zavod obavlja poslove utvrđene Zakonom o zdravstvenoj zaštiti i Odlukom o standardnoj klasifikaciji djelatnosti u Federaciji Bosne i Hercegovine («Službene novine FBiH», broj 28/98) i to:

- 85. 121. Djelatnost medicinske prakse i
- 85. 122. Zdravstveno-preventivna zaštita.

U okviru djelatnosti iz stava 1. ovog člana, Zavod obavlja:

- stacionarnu i ambulantly-polikliničku zdravstvenu zaštitu sa rehabilitacijom oboljelih ovisnika,
- prevenciju, dijagnostiku, rehabilitaciju i socijalnu reintegraciju ovisnika,
- provođenje programa edukacije i metadonskog programa prema standardima Svjetske zdravstvene organizacije,
- vođenje registra bolesti ovisnosti,
- ostvarivanje saradnje sa svim zdravstvenim ustanovama i specijaliziranim ustanovama iz oblasti borbe ovisnosti (osnovne i srednje škole, prosvjetno-pedagoški zavodi, visoko-školske ustanove, centri za socijalni rad, nevladine organizacije, te udruženje građana i roditelja),
- organizovanje stručnih savjetovanja, seminara, javnih tribina, predavanja i drugih aktivnosti od značaja od ostvarivanja djelatnosti Zavoda.

**Član 5.**

Zavod može proširiti ili promijeniti djelatnost i vršiti statusne promjene: spajanja, pripajanja, podjele i izdvajanja.

Odluku iz stava 1. ovog člana donosi Skupština Kantona.

#### **IV IZNOS SREDSTAVA ZA OSNIVANJE I POČETAK RADA, NAČIN OBEZBJEDIVANJA SREDSTAVA ZA RAD I NAČIN RASPOLAGANJA VIŠKOM PRIHODA NAD RASHODIMA**

**Član 6.**

Početna sredstva za osnivanje i početak rada Zavoda obezbjeđuje Kanton i Kantonalni zavod zdravstvenog osiguranja Zeničko-dobojskog kantona (u daljem tekstu: Zavod zdravstvenog osiguranja).

**Član 7.**

Sredstva za rad Zavod ostvaruje:

- ugovorom sa Zavodom zdravstvenog osiguranja,
- iz sredstava Kantona u skladu sa ovom odlukom,
- iz sredstava dobijenih učešćem korisnika zdravstvene zaštite u pokriću dijela ili ukupnih troškova zdravstvene zaštite,
- iz drugih izvora, na način i pod uslovima određenim zakonom, ovom odlukom i statutom Zavoda.

**Član 8.**

Višak prihoda nad rashodima Zavod koristi za obnavljanje i razvoj djelatnosti.

#### **V MEDUSOBNA PRAVA I OBAVEZE IZMEĐU OSNIVAČA I USTANOVE**

**Član 9.**

Za svoje obaveze Zavod odgovara sredstvima sa kojima raspolaže.

Kanton ne odgovara za obaveze Zavoda.

#### **VI UPRAVLJANJE I RUKOVOĐENJE**

**Član 10.**

Organ upravljanja Zavodom je upravni odbor.

Upravni odbor ima predsjednika i četiri člana i čine ga predstavnici:

- osnivača - tri člana,
- zdravstvenih radnika Zavoda - jedan član i
- predstavnik Kantonalnog ministarstva zdravstva Zeničko-dobojskog kantona - jedan član.

Predsjednika i članove upravnog odbora imenuje i razrješava Vlada Kantona, po postupku i na način utvrđen zakonom.

Upravni odbor vrši poslove utvrđene Statutom Zavoda u skladu sa Zakonom o ustanovama.

**Član 11.**

Organ rukovođenja Zavodom je direktor.

Direktora Zavoda imenuje i razrješava upravni odbor Zavoda, na osnovu javnog konkursa, uz prethodno pribavljenu saglasnost Vlade Kantona.

Direktor organizuje i rukovodi radom Zavoda, zastupa i predstavlja Zavod prema trećim licima i odgovoran je za zakonitost rada Zavoda. Direktor obavlja i druge poslove utvrđene zakonom i statutom Zavoda.

**Član 12.**

Organ kontrole finansijskog poslovanja Zavoda je Nadzorni odbor.

Nadzorni odbor Zavoda ima tri člana.

Jedan član nadzornog odbora imenuje se iz reda stručnih radnika zaposlenih u Zavodu.

Predsjednika i članove Nadzornog odbora imenuje i razrješava Vlada Kantona, po postupku i na način utvrđen zakonom.

**Član 13.**

Nadzorni odbor:

- analizira izvještaje o poslovanju Zavoda,
- u obavljanju nadzora nad upotrebom sredstava za rad, pregleda godišnji izvještaj o poslovanju i godišnji obračun,
- pregleda i provjerava urednost i zakonitost vođenja poslovnih knjiga,
- podnosi izvještaj Vladi Kantona, upravnom odboru i direktoru Zavoda o rezultatima nadzora.

**Član 14.**

Zavod može imati stručne i druge organe što će se bliže regulisati statutom i drugim općim aktima Zavoda.

#### **VII PRELAZNE I ZAVRŠNE ODREDBE**

**Član 15.**

Vlada Kantona će u roku od petnaest dana od dana stupanja na snagu ove odluke, privremeno na period utvrđen zakonom, imenovati Upravni odbor i vršioca dužnosti direktora Zavoda.

**Član 16.**

Vršilac dužnosti direktora Zavoda je dužan preduzeti sve potrebne radnje za upis Zavoda u sudski registar.

**Član 17.**

Upravni odbor Zavoda će u roku od trideset dana od dana imenovanja donijeti statut Zavoda, a u roku od šezdeset dana i druge opće akte iz svoje nadležnosti.

**Član 18.**

Ova odluka stupa na snagu osmog dana od dana objavljivanja u «Službenim novinama Zeničko-dobojskog kantona».

Broj: 01-37-28382/05

**PREDSEDavajući**

Zenica, 13.10.2005. godine

Besim Spahić, s.r.

.....

**Sadržaj sl.nov.br.11/05****SKUPŠTINA**

305. Zakon o izmjenama i dopunama Zakona o radu u Zeničko-dobojskom kantonu, . . . . .	527
306. Zakon o izmjeni Zakona o unutrašnjim poslovima Zeničko-dobojskog kantona, . . . . .	527
307. Odluka o prestanku mandata poslanika u Skupštini Zeničko-dobojskog kantona, . . . . .	528
308. Odluka o osnivanju javne zdravstvene ustanove Kantonalni zavod za borbu protiv bolesti ovisnosti. . .	528

**Izdavač:** Zeničko-dobojski kanton, ul. Kučukovići br. 2, Zenica,  
**v.d. glavni i odgovorni urednik:** Željka Marković - Sekulić. **Telefon:** (032) 245 607;  
**Redakcija i pretplata** (032) 407 424; **Štampa:** "Dom štampe" d.d., Zenica